

Frieher

Also wenn merr emol noochlese dut, dass die Wörter, die im Deutsche omm meisde gebraucht werrn, *die, der, und* sinn, donn dut oom dess nitt wunnern. Wunnern due isch mich aach nitt doodriwwer, dass dess Wort *Zeit* aach gons vorne beim Gebrauch debei iss. Weil „Isch habb koo Zeit“ dut merr omm Daach effderr heern unn grad donn, wenn merr widder emol den Mensch newer dir frooche dut: „Kennsde merr des grad emol mache?“

No ja, die beschriwwene Beispille dun die allgemeine Sprooch betreffe unn dess iwwers gonse deutsche Gebabbel hieh, obs Kinner sinn odder Erwachsene. Dess iss awwer gebabbeld ohne die Alde, weil bei dene iss *frieher* dess omm meisde gebrauchde Wort.

Dess iss joo aach koo Wunner. Weil frieher war alles besser, dess moont merr nitt nor, dess war aach su. Doo konnt merr noch enn Borzelboom schlaache, konnt longe Trebbe hochrenne, konnt noch meddem Fahrrad de Wickerer Berrsch hochfahrn, konnt beim Stadtfest noch bis nachts um Drei omm Mitter soim Woistond stieh unn konnt dort stunnelong babbele unn lache, weil koo Knie hott wieh gedue, dess Kreiz iss nitt dorschgebroche unn de Arm unn die Finger sinn nitt mied worrn vom Festhalle omm Woiglas.

Odder wenn omm Haus odder im Gadde ebbes ze mache war. De erst hosde disch e Weil vor dere Arwett gedriggd, awwer donn must dess gemachd werrn unn du host dess aach gemachd. Wenns gons vill ze due war, hosde disch donn in die Badewonn ins heiße Wasser geleeschd, dess hott disch widder uff die Boo gebrochd. Awwer enn Alde, wenn der ebbes mache muss, duts emm schwerfalle unn er muss sich allsfort zwischedorsch emol hiehsetze unn muss sich ausruh. Unn frieher hosde aach mieh Abbedit gehabt, host drei Schnitzel uff oomol gesse unn host noch gefroochd, was duts zum Noochdisch gewwe.

Awwer frieher hott merr aach owends uff de Bonk vorm Haus gesotze unn hott mett de Nochbern gebabbeld, hauptsächlich iwwer die Leit, unn wenn emol e Gaaß vunn ihm Stall abgehauene unn uff die Bohnschiene gerennd unn vumm Zuuch todfahrn worrn iss, dess hott merr schnell geheerd unn hotts schnell widder weider verzähld.

Ach frieher – unn wenn des rischdisch iwwerleesche dust, iss frieher grad vor e paar Minutte gewese.

Eiern Honnes